

MARILENGHE

Cîl & Tîere, la prime riviste scientifiche in marilenghe

“Cheste riviste di alt nivel sientific e je une dimostrazion di cemût che si puedin insegnâ e pandi lis sciencis ancje doprant la lenghe furlane; dal rest la dignitât e l'avignî di une lenghe si pesin su la sô potenzialitât e capacitât di pandi i concets plui alts de culture sientifiche e tecnologjiche moderne”. Chest il coment dal president de Provincie di Udin Pietro Fontanini in relazione a Cîl & Tîere, la prime riviste di divulgazion sientifiche in marilenghe presentade lunis ai 14 di Avrîl a palaç Belgrât tal ambit dai apontaments in program pe Fieste dal Friûl. Il prin numar de riviste, publicade de cjase editore Forum e direte dal prof. Marzio Strassoldo, al propon une interviste al retôr de Universitât dal Friûl, **Alberto Felice De Toni** e, in relazione ai setôrs di studi (macroeconomie, fisiche, meteorologjie, biologie, economie ambientâl, chimiche e neurosciencis), articui di aprofondiment sul prodot interni lort tant che indicadôr di benstâ, sul clime e l'incuinament, su la evoluzion

de vite su la tiere, sul valôr de agricultore pe societât, sul ciment armât e lis tecnichis antisismichis, sul leam jenfri neurosciencis e meditazion. In colaborazion cu la Societât sientifiche e tecnologjiche furlane, l'Arlef e cul patrocini dal Cîrf (Centri interdipartimentâl universitari di ricercje su la culture e la lenghe dal Friûl) “cheste riviste – al spiege il diretôr Strassoldo – e vûl dâ un aiût al lavôr di ducj chei che, tal ambit de scuele, de universitât e des aziendis, a intindin doprâ e valorizâ la marilenghe”.

La presentazion e je stade moderade dal diretôr dal Cîrf, prof. Paolo Pascolo, e e à viodût la partecipazion, oltri che dal President Fontanini, ancje dal retôr dal Ateneu di Udin **Alberto Felice De Toni**, dal sindic Furio Honsell, di Lorenzo Fabbro, president de Arlef, di Federico Vicario, president de Societât Filologjiche Furlane, di Pietro Pittaro, president di Ent Friûl tal mont, e di Alessandra Burelli rapresentante de Societât sientifiche e tecnologjiche furlane.



Peso: 28%